

DEPORTATUAK. Cabo Verdera senideen eta ezker abertzalearen ordezkaritza abiatu zen atzo

Leteren heriotza ez dela «naturala» izan salatu dute, deportazioak eragina baizik

«Urteetan bizitako egoera latza» nabarmendu du bere neska-lagunak



GOTZON ARANBURU / ARGAKZI PRESS

Karmele Aierbe, Jean-François Lefort, Juan Mari Olaizola, Maite Robles eta Josune Lete, atzo, Legazpin.

Xabin Makazaga | LEGAZPI

Angel Lete Etxaniz errefuxiatu legazpiarra Cabo Verden eritasunak jota hil delarik, haren ahaide eta lagunak salatu dute heriotza ez dela «naturala» izan, «deportazioak eragina» baizik. Atzo bertan Cabo Verdera abiatu aurretik, Leteren neska-lagun Maite Roblesek «amorrua, goibeltasuna eta inpotentzia» azaleratu zituen, Legazpin eginiko agerraldian. Jean-François Lefort Askatasuneko ordezkaria, Karmele Aierbe Gipuzkoako Sozialista Abertzaleetako batzarkidea, Josune Lete hilaren arreba eta Juan Mari Olaizola laguna izan zituen ondoan.

MAITE ROBLES

Angel Lete Etxanizen neska-laguna

«Gorputzak bilakaera izaten du gero eta egoera latzagoan, eta hiltzeko modu bat da hori. Ez da heriotza naturala izan»

Lete Etxanizek «bizitza osoa Euskal Herriaren aldeko borrokan» eman duela adierazi zuen Olaizolak: «1974ko azaroaren 11n Frankismoaren errepresioetik ihes egin ondoren, Ipar Euskal Herrian errefuxiatuta eman zituen urteetan, eta gero Cabo

Verden, Frantziak 1985ean deportatu zuenetik, 17 urtez».

Maite Robles neska-lagunak azpimarratu zuen urte horietan guztietan Angel Letek pairatu duen «sufrimendua» berak ere bizi behar izan duela. «Cabo Verdera berrogeitaka aldiz joan naiz 17 urteotan. Ez da batere erraza izan, baina aurrera egin genuen, bere kemenagatik eta herriari zion maitasunagatik». Egoera «oso latzak» bizi izan dituztela erantsi zuen Leteren neska-lagunak: «Hango kultura, hizkuntza, baloreak... eta osasuna, noski». Egoera horri lotu zitzaion Robles, Leteren heriotza azaltzeko: «Gorputzak bilakaera izaten du, gero eta

egoera latzagoan, eta hiltzeko modu bat da hori. Heriotza ez da naturala izan».

Goibel agertu arren, Cabo Verdeko lagunekin hitz egin ostean «poza ere» bazuela esan zuen Roblesek: «Oso integratuta zegoen, eta esan didate kide eta lankideek azken agur ikusgarria egin ziotela. Halako herri batean, bere izaera eta borrokatik integratu zen; haiek ere eskertu diote egin duen guztia».

«Deportazioa ez da doan»

Deportazioak bere ordaina duela gaineratu zuen Roblesek: «Gauzak ez dira doan. Hainbeste sufrimendu, atsekabe, muga eta baldintza txarren ondorio dira, deportazioan gertatzen ari diren zoritxarrak. 'Gaitz erdi' esaten zitzaion deportazioari, baina argi dago ez dela horrela; hor daude bidean gelditu diren guztiak. Etsaiak bazekien zer zekarren horrek, deportatuentzat eta haien senideentzat».

Lefortek ere, heriotza ez dela berezkoa izan esan zuen: «Euskal iheslari batentzat ez da batere naturala bere herritik hain urrun hiltzea». Frantziako eta Espainiako estatuei erreparatu behar zaiela erantsi zuen: «Beren tresna errepresibo guztiak abian dituzte, euskal herritarren kontra eta bereziki euskal gudarien kontra». Ramon Gil Ostoa-garen kasua gogora ekarriz, Leterena ere «heriotza zigorraren aplikazioa» izan dela esan zuen Askatasuneko kideak. Aurrez beste sei deportatu ere hil direla erantsi zuen Lefortek.

Herenegun Giza Eskubideen Nazioarteko Eguna izan zela gogora ekarriz, «non daude euskal preso eta iheslarien eskubideak?», galdegina zuen Lefortek.

Leteren heriotzaren aurrean, hilaren 13an eta 19an egitekoak diren mobilizazioak «indartze» deia egin du Askatasunak.

Atzo gauean, bestalde, elkarretaratzea egin zuten Legazpian laurogei lagunak, eta gaur iluntzeko zortzietan berriro egingo dute.

LABURREAN



LUIS JAUREGIALTZO / ARGAKZI PRESS
Daniel Diez.

PSE-EEko gazteriak herri kontsulta eta presoak hurbiltzea proposatu du

«Indarkeriarik gabeko egoeran» herri kontsulta egitea egoki irizten dio JSE-Egaz gazte erakundeak, datorren asteburuan Bilbon egingo duen kongresuan eztabaidagai izango duten ponentzian. Daniel Diez idazkari nagusiak atzo prentsurrekoan azaldu zuenez, galdeketa egin aurretik «indar politikoaren arteko adostasuna» lortu beharko litzateke, eta «zantalzarik sortzen ez duen galdera garbia» egin beharko litzateke. «Presoak hurbiltzea» ere proposatzen du PSE-EEko gazteriak kongresurako txostenean. Diezek idazkari nagusi izateari utzi egingo diola jakinarazi zuen.

Eusko Legebiltzarreko aurrekontua %3,66 igoko da 2003. urtean

Eusko Legebiltzarrak 24 milioi euroko aurrekontua izango du datorren urtean, aurtengo baino %3,66 gehiago. Hala erabaki zuen atzo Legebiltzarreko Araudi eta Premiazko jardura legegilearen batzordeak. Era berean zehaztu zuen legebiltzarkideen hileroko soldata 2.500 eurokoa izango dela eta taldeena 15.000 eurokoa.

Gaizka Areizaga preso donostiarra aske utziko dute, 21 urtez kartzelan izan ondoren

Gaizka Areizaga preso donostiarra aske utziko dute Darocako (Zaragoza) kartzelan gaur, 21 urtez espetxeraturik izan ondoren. Bere auzoan, Antiguan, ongietorria egingo diote gaur iluntzeko zortzietan, Benta Berriko plazan: aurrekua dantzatu diote, bertsoak eskainiko dizkiote, eta Antiguotarrak elkartean eskegita dagoen argazkia kendu egingo du. Hilaren 28an omenaldia egingo diote Antiguan bertan.

ATXILOKETAK. Bost urteko espetxe zigorra ezarri zien Espainiako Auzitegiak, ustez ETA laguntzeagatik

Frantziako Poliziak Francisco Rodriguez eta Ainhoa Gutierrez atxilotu ditu Miarritzen

Erredakzioa | BAIONA

Frantziako Poliziak Francisco Rodriguez Jaramillo eta Ainhoa Gutierrez San Torcuato atxilotu zituen atzo goizean Miarritzen. Rodriguez eta Gutierrez 1997ko irailaren 24an atxilotu zituzten lehen aldiz, ustez ETArekin Bizkaia komandoko kide ziren

Gaizka Gaztelumendi eta Jose Miguel Buztintzari laguntza emateagatik. Bilbon izandako tiroketa baten ondorioz, Gaztelumendi eta Buztintza hil egin ziren, eta ondoko egunetan Poliziak hainbat pertsona atxilotu zituen, ETako azpiegitura sarean osatzen zutelakoan.

Madrilgo Auzitegi Gorenak

2000ko urriaren 20an bost urteko espetxe zigorra ezarri zien Rodriguez eta Jaramillori, ETari beren etxebizitza eta garajea uztea egotzita. Bi urtez behin-behineko espetxe zigorra bete ondoren, biak libre gelditu ziren.

Joan den urriaren 30ean, aldiz, Espainiako Auzitegi Gore-

nak bien kontrako bost urteko espetxe zigorra berretsi zuen, eta geroztik ez zuten egoitza ezagunik.

Alabaina, Espainiako Poliziak prozedura berean zeuden Unai Ipas eta Lourdes Cerrato atxilotu zituen egun berean, lehena ETako kide izateagatik eta bigarrena erakunde armatuari laguntza emateagatik. Madrilgo Auzitegi Gorenak sei urteko espetxe zigorra ezarri zien Ipasi eta Cerratorri.